

# Ina schleppa massiva – la taglia sin energia resta in tema

■ (anr/vi) Ils verd-liberals cumenzan l'onn electoral cun ina terrada a l'urna. Il pievel ha refusà ier lur iniziativa a moda massiva. Giu da maisa n'è la taglia sin energia tuttina betg. Duas cusseglieras federalas planiseschan ina tala. «In'utopia» ha il politolog *Claude Longechamp* numnà ier l'iniziativa dals verd-liberals «taglia sin energia nunregenerabla empè da taglia sin plivalur». Cun questa idea radicala ha la pvl incassà ier ina schleppa quasi istorica a l'urna.

Da vulair abolir la taglia sin plivalur saja para stà in pass memia grond, ha ditg ier *Tiana Angelina Moser*, scheffa da fracziun da la pvl. Per malsegirezzas haja era procurà che la Banca naziunala haja dà si il curs minimal da l'euro. «Jau sun persuadida che quai ha giugà ina rolla», di Moser. La prontadad da sa lachar en sin midadas saja uschia sa smi-nuida.

La scheffa da fracziun dubita che la refusa massiva haja in effect sin las elecziuns federalas da quest atun.

## Plans da Widmer e Leuthard

Tenor la «SonntagsZeitung» quintan *Eveline Widmer-Schlumpf* e *Doris Leuthard* da suttametter al cussegl federal ina taglia sin energia. I sa tracta d'ina taxa directiva per cuntanscher las finamiras da spargnar energia da la confederaziun.

In artigel en la constituziun duai dar al cussegl federal la cumpetenzza d'imponer ina «taglia da clima e da current». Las entradas duain vegnir dadas enavos a la populaziun. Tenor calculaziuns da model duvrass quai sper la taglia sin current anc ina taxa supplementara sin benzina per cuntanscher las finamiras. La «SonntagsZeitung» scriva ch'il cussegl federal discuteschia gia il venderdi proxim davart quests plans.



La «taglia sin energia nunregenerabla empè da taglia sin plivalur» ha fatg naufragi.